

**■ CUSSEGL DAL PUBLIC SRG.R**

## Redacziun en chasa federala e rapports dal campionadi mundial sut la marella

**(cp) La sesida dal settember dal Cussegl dal public SRG.R (CP SRG.R) è stada quella giada extra muros a Casti. En questa sesida è il CP SRG.R s'occupà cun ils rapports da RTR Radiotelevision Svizra Rumantscha or da la chasa federala a Berna.** En pli è ina grupp da lavur sa participada a l'examinaziun naziunala da tut ils cussegl dal public da la SRG SSR davart il Campionadi mundial da ballape 2014 da la Fifa en la Brasilia. La grupp ha examinà la purschida da RTR e cumpareglia quella cun l'offerta da las autras regiuns linguisticas. La nova directura da RTR, *Ladina Heimgartner*, ha participà per l'emprima giada a la sesida dal CP.

Il Cussegl dal public lauda ils rapports da RTR Radiotelevision Svizra Rumantscha or da la chasa federala a Berna. *Adrian Camartin* e *Claudio Spescha* persvadan cun lur cumpetenza linguistica ed in'excelenta tscherna da tematicas. Ils auditurs e las audituras survegnan infurmaziuns fundadas davart las activitads politicis. Las contribuziuns survegnan il spazi d'emissiu necessari e las tematicas vegnan messas en il dretg context. Ils rapports tractan per gronda part cuntegns relevants per il chantun Grischun ed ils parlamentararis grischuns vegnan a pled. Il CP SRG.R deplorescha la midada da Claudio Spescha en la redacziun da la «Tagesschau» da SRF Schweizer Radio und Fernsehen. Sia successura è *Anna Serarda Campell*.

Il concept da RTR Radiotelevision Svizra Rumantscha per il Campionadi mundial da ballape 2014 da la Fifa en la Brasilia è stà fitg cumplexiv. L'entschatta da zercladur hai dà ils emprims rapports dal CM da ballape. Durant il turnier han ins intensivà ils rapports. Per l'emprima

giada ha RTR commentà per rumantsch partidas da ballape da la squadra naziunala svizra via livestream. Quest experiment è sa sviluppà per RTR ad in highlight da quest campionadi. Il livestream cun commentari rumantsch ha chattà grond interess tar il public. Il CP SRG.R fa ina bilantscha positiva dals rapports da RTR ed è surprais da la diversità dals differents rapports sin tut ils vecturs. Las expectativas en pli che accumuladas ed igl è stà in plaschair da participar cun RTR al CM da ballape. Ils reporters n'han betg mo intermedià resultats, mabain han er furnì infurmaziuns complementaras davart la Brasilia sco pajais ospitant. RTR n'ha tuttina betg pudì rapportar da tut las partidas. Ils gieus da la squadra naziunala svizra han pudì vegnir persequitads cun commentari rumantsch via livestream. Tut las autras partidas en stadas da vesair sin ils emetturs da SRF u sin ils emetturs da las autras unitads da l'interpresa.

RTR vegn a rapportar per rumantsch via livestream sin la pagina [www.rtr.ch](http://www.rtr.ch) er davart las partidas da qualificaziun da la squadra naziunala per il Campionadi europeic 2016 da l'Uefa en Frantscha. Las emprimas difficultads tecnicas cun il livestream han ins schlià gia durant il CM da ballape. Il CP SRG.R giavischa in schlargiament da questa purschida e vul laschar sclerir sch'ins pudess porscher il commentari rumantsch sco bi-chanal sin l'emettur SRF2.

En la proxima sesida il november 2014 s'occupa il CP SRG.R cun las contribuziuns per giuvenils da «Battaporta». En pli vegn reglada la successiun da *Martina Schudel-Noggler* che sa retira per raschuns personalas sin la fin da l'onn dal CP SRG.R.



**Andreas Wieland e Romand Dobler han rapportà per il Radio Rumantsch dal Campionadi da ballape 2014 en Brasilia.**